



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : f Tir Yimym

Instagram tir_yimym

YouTube tir yimym

TAPAK 7

Steve Smith Australia squad nung zingoksemogo

Iran-i uranium enrichment yutsütsüla aser tali meyanglutsüla: Netanyahu



VOL. XXIII ISSUE NO. 125 (ADOK 125) DIMAPUR SANGTENNÜ (TUESDAY) TSÜKLAI (FEBRUARY) 17, 2026 ₹ 5.00

Feb 18 nü AHoDs & HoDs senden amentsü

Dimapur, February 16, 2026 (TYO): February 18, 2026 nü Administrative Head of Departments (AHoDs) aser Head of Departments (HoDs) senden ka amentsü metetdaksüogo.

Sendenji Nagaland Civil Secretariat, Conference Hall, Kohima nung nikongdang 2:30 ako nungi tenzüksü. Anungji senden nung ADoDs aser HoDs ajak adentsü metetdaksüogo.

NETU-i Khemchand Singh nem tenünsang agütsü

Kohima, February 16, 2026 (TYO): Yumnan Khemchand Singh-i Manipur nung Chief Minister inyakba atema North East Taekwondo Union (NETU)-i tenünsang agütsüogo.

ta paisa ashi.

"North East Taekwondo Union nung President ka ama Manipur nung Chief Minister jenjang atongba asoshi tenünsang agütsür" ta paisa shisem.

Khemchand Singh ya yimtenren tanishir ka dang masü aser temulung agütsüba, tasü aitba, ajemaluba aser azüokba ajanga lenisüba ajunger ta Pele-isa ashi.

Khemchand-i Chief Minister atongba ajanga Northeast aser India nung lanur saisapongertem dang saisapongba ajanga tia melentsür ta osang sangoktsür, ta paisa metetdaksü.

DHFW-i GeorgelnsIN den MoU sign sütep



Dimapur, February 16, 2026 (TYO): February 16, 2026 nü Department of Health & Family Welfare, GoN aser The George Institute for Global Health, India tsüngda Memorandum of Understanding (MOU) nung sign sütepogo.

wide health reforms nung tanishir ka lir aser Nagaland-i parnok den teka amteper inyaka aotsüba ya maongka tulu ka lir ta laisa shisem.

PATANG project (Promoting Community Action for Health) ajanga Nagaland nung communitization reforms alitsü. Iba maparen ajanga loktitem tashi itdaksütsü aser civil societies, sorkar aser nübortem tsüngda tesentaktep akangshiteptsü ta Dr. Mereninla-isa ashi.

Iba Institute ya research organization ka lir aser PATANG project ya India alima ajungalen inyaker saka India nung temulung agütsür ta George Institute for Global Health India nung Director Dr. Pallab Maulik-i ashi.

Iba Institute nung researchers 250 aser field staff 400 tema lir aser parnoki tesem balala nung inyaksangshia arur ta paisa ashi.

Sentong nung Program Director Dr. Deviki Nambiar-i PATANG initiatives indang Strategic Roadmap & Way Forward indang temetetsü lemsatep.

Iba sentong nung Deputy Director Dr. Thomas Keppen-i tesenteper ajak pelashisha agizük aser George Institute for Global Health o Department of Health and Family Welfare tsüngda tesentaktep yangluba indang osang lemsatep.

Iba MOU sign sütepba ajanga Nagaland state asoshi tajangzük aika bentsür arutsü ta Dr. Thomas-i ashi.

Principal Director, DHFW Dr. Mereninla Senlem-ia The George Institute for Global Health, India nungi teshimtet pelashishia agizük.

Iba MOU sign sütepba ajanga health system akangshiba aser Nagaland nung population health tajungba akümtsü ta Dr. Mereninla-i ashi.

George Institute for Global Health ya research aser system-

ANATG-2015 tesayurtemi anogo 10 buba lungkak aitogo Tanü School Education Advisor den senden amentsü



Kohima, February 16, 2026 (TYO): All Nagaland Adhoc Teachers' Group (ANATG)-2015 Batch tesayurtemi tanü agi anogo 10 buba tashi lungkak aitogo aser School Education Department-i parnok dang mapa inyaktsü aser lungkak aitba anentsü shidi zülü saka magizüker.

Osang angazükba agi asüng Advisor aser School Education ketdangsürtem den senden ka amentsü sentong lir.

Tesayurtemi Directorate of School Education nung lungkak ait aser lokti senden ka amendang lemtet agiba nungi marakzütsü

lemtet shiogo.

Department-i mepishiba magizüker aser shidi nung adhoc tesayur 1,166 tashi regularize asütsü atema mapang telatet mali anungji magizüker ta ANATG-2015 Batch-i metetdaksüogo.

Department-i February 12 nü shidi ka züluba nung lungkak aiterem dang mapa inyaktsü indang ayongzuka liasü.

Sorkari ken o jungjunga asadanger aser angatetteptsü meranger. Kaketshirtemi meima amaliteptsüla aser maparen inyaka aotsü mepishir ta Department-isa metetdaksü.

Ajisüaka, ANATG-2015 Batch-i mapang telatet maliba ajanga lungkak aitba manentsü lemtetogo.

Mapa shitak inyaktsü nangzükba ajanga February 13 anepdang nungi lumia lungkak aitba anena liasü saka maneni tenzüksü ta tesayurtemi ashi.

School Education Advisor Dr. Kekhrielhoulie Yhome-i HPC lia sendaktepa alirtem den senden ka amentsü jaoka lir. Iba senden ya Mongulbar anepdang 11:00 ako nung jazükogo aser iba nung lemtet tajung agitsü imlar ta ANATG-2015 Batch tesayurtemi ashi.

ECI-i Assam assembly election maparen repringshir

Guwahati, February 16, 2026 (Agencies): Chief Election Commissioner Gyanesh Kumar-i anir Election Commission of India (ECI) full bench kati tanü Assam semdangi arua lir.

Assam nung Assembly elections agitsü aliba dak sendakba nung maparen inyakba meuyipa repringshitsü asoshi parnok aru.

Iba teshimtet telok nung Election Commissioner ana-Sukhbir Singh Sandhu aser Dr. Vivek Joshi na dena lir aser

parnok Guwahati tonga arudang Assam Chief Electoral Officer Anurag Goel-i pelashishia agizük.

ECI bench-i Mongulbarnü political parties tanishirtem, election ketdangsürtem aser state regulatory authorities den senden amentsü.

Maneni, District election officers aser superintendents of police-ia Commission den election dak sendakba maparen inyakba osang lemsateptsü.

Commission-isa Chief Secretary, Home Secretary,

Director General of Police, Chief Electoral Officer, police nodal officers aser tanga state tongti ketdangsürtem den ajuruteptsü.

Chief Election Commissioner Gyanesh Kumar aser Election Commissioner anati February 18, 2026 nü media den jembitsü.

Züngsem 126 agi akümba Assam Legislative Assembly indang kümsük May 20, 2026 nü tembangtsü aser March-April nung election agitsü sentong lir.

CYO-i Maova nunger nem anogo 7 züngzüksür

Dimapur, February 16, 2026 (TYO): Chakhroma Youth Organisation (CYO)-i Maova Village Council (MVC) dang anogo tenet tsüngda mapa inyaktsü mapang züngzüksüogo.

Chakhroma Public Organisation (CPO) lennirtem amakba nung shilem agir ajak parnok tsüngdangi anir arutsü aser angatetteptsü atema CYO-i metetdaksü.

February 13 nü CPO tir aser külem züngsemtemi tangatetba tajung nung olemtep alitsü atema Maova yimtsüng semdangdang

amak ta CYO-i MVC chairman dang shiogo.

Iba mapang amakertemi lijak, lung aser tanga osettem amshidang CPO tanishirtem aser züngsemtem kanga mejungi yitutsü ta CYO-isa ashi.

Iba inyakim ya magizüker aser iba ajanga kidanger kintem tsüngda yimjung aser putepa aliba nung lendong bentsür arutsür ta parnokisa ashi.

Iba jagi MVC chairman den GB Seiboi Changsan aser ozüng alema inyakertem ajak CPO Hall, Chümoukedima-i arua osang

jangjashiteptsü aser angatetteptsü tetuyuba agütsür ta CYO-isa metetdaksü.

Iba tetuyuba ya anogo tenet, February 23 tashi nung inyaktsüla mesüra CYO-i Angami customary law aser lateta aliba inyakimtem nung ajemdaker teinyaktsü tim inyaktsüsa akümtsü ta parnokisa metetdaksüogo.

Iba tetuyuba sülen manidakra MVC chairman aser GB nati tebilemtsü khuret abentsü aser CPO lennirtem dak inyakba asoshi tenüng agitsü ta CYO-isa ashi.

Kohima nung District Road Safety Award 2026 agütsü



Kohima nung District Road Safety Award 2026 agütsüba mapang tangokba noksa angur.

Dimapur, Tsüklai/February 16 (TYO): Kohima District Road Safety Committee (KDRSC) ajanga DPDB Hall, Kohima nung February 16, 2026 nü National Road Safety Month nüngtem nung 2 buba Kohima District Road Safety Award-2026 ayongzüka liasü.

Lenmang mesümenangba aser yimya meshidaki gari anena ayuba tebilemtsü ya ketdangsürtem kisüngi mazüoktetsü aser nüburtemia lungjemer yimya shidak amshitsü nüngdaker, ta MLA & Chairman DPDB Kohima, Kevipodi Sophie-i iba sentong nung sempet agütsüdag ashi.

Traffic timtem makai jajatsü atema KDRSC ajanga administration den yaritepba asoshi pai pelaba lemsatop aser district ajungtsü atema maneni amalitep akatsü imlar, ta ashi.

Deputy Commissioner & Ex-Officio Chairman KDRSC, B. Henok Buchem-i iba sentong nung jembidang, langa aliba telok aika nungi kanga junga asadangba sülem sempet angur parnok trok ya shimtet ta ashi.

Alinen alua timtemba mapang village councils aser lanur lokti balalai ola madoki timtem arema inyaka

administration den akok tashi yaritepa arua nüburtem senzüdaktsü, ta pai ashi.

Traffic özüng shidak amshitsü ya tanen maka tebilemtsü lir, anungji village councils, colony ketdangsür, lanur lokti aser nüburtem nungi amalitep akatsü nüngdaker, ta pai ashi.

Administration-i transport regulation tashi itshitsü aser mera balala maneni agütsü, ta Kohima DC ajangasa ashi.

Pai nüburtem dang traffic özüng shidak amshitsü, tapi agi gari anena mayutsü aser nüburtem jajaba lenmang tem menokdangtsü ayongzüka aser Kohima ya asenok ajak meyong lir ta ashi.

Iba sentong nung EAC Kohima Sadar, Dr. Riku Khutso menden liasü aser RTO & Ex-Officio Member Secretary, KDRSC, Roben Mesen-i sempet angurtem tenüng zünga ashi.

Sempet ya Upper Jail Colony Panchayat, Jotsoma Youth Organisation, Kezoma Village Council, Naga Bazaar Youth Organisation aser Integrated Command & Control Centre (ICCC) nungi personnel nem agüja liasü.

Upper Jail Colony

Panchayat-i Jail Colony lemjem nungi Assamese Church lemjem tashi lenmang tezülen gari anena ayuba ketdang asüba mechi iba sempet ya agüja liasü.

Jotsoma Youth Organisation ya NH-29 nung alinen aluba mapang administration aser nüburtem yariba aser taoba küm meyi mapang Jotsoma Bypass road ajanga traffic diversion ketdangsüba asoshi iba sempet ya agütsü.

Kezoma Village Council-i par litsü alema gari tulu senzüdaktsüba mapang yaritepba asoshi tenüingsang ya agüja liasü.

Naga Bazaar Youth Organisation ya parking ketdang asüba aser NHAK lemjem nungi Census Point lenmang tashi barricades inokba asoshi tushia liasü.

Kohima jila nung traffic ketdangsüba tajungba kumdaktsütsü asoshi bendanga agütsür tenzüka mechi ICC personnel nem iba sempet ya agüja liasü.

Road safety asoshi shilem tajung agiba kija, telok, lokti tentet aser department balala tushitsü atema iba sempet ya agütsür, kong senpet sen 10,000 den kulizüng kaket ka dena lir.

February 28 nü State Level National Science Day amungtsü

Dimapur, Tsüklai/February 16 (TYO): State Level National Science Day 2026 ya Capital Convention Centre, Kohima nung February 28, 2026 nü amungtsü, ta Department of Science & Technology, Government of Nagaland ajanga metetdaksü.

Iba anogomung nung shilem ka ama sentong nung NBSE

Government school tem nungi Class VIII nung Science aser Mathematics nung marks timtiba ngua alir Indigenous Naga Girl Child aser Indigenous Naga Scientists; Research & Development nung State Science & Technology Awards 2025 agütsütsü, ta sangdong ajanga ashi.

Chümoukedima nung Mock Disaster Management Exercise alitsü

Dimapur, Tsüklai/February 16 (TYO): Chümoukedima nung 2025-26 küm atema renemshia aliba nung shilem ka ama February 23 & 24, 2026 anogotem Mock Disaster Management Exercise alitsü, ta District Disaster Management Authority (DDMA), Chümoukedima ajanga sangdongogo.

Iba exercise anogo aser mapang melenshi aser phase ana nung agütsü, ta Deputy Commissioner & Chairman, DDMA Chümoukedima, Polan John-i ashi.

Table Top Exercise ka February 23, 2026 anüngdang 11:00 ako nungi DC Office Conference Hall nung agütsü aser Mock Exercise ya

February 24, 2026 anüngdang 11:00 ako nungi Chümoukedima Village Ground nung alitsü.

Department balala tsüngta amalitep aliba nung tali tashi itshitsü, ajungben lendong timtem mapang telangzüba agütsüba inyakyim asadangtsü aser lendong mapang nüburtem tali renema alitsü nükjidong nung iba mock drill ya agütsü.

Iba mock exercise nung security forces, health ketdangsür aser yimtsüng ketdangsürtem shlem agütsü totuyuba agütsüogo.

Maneni Deputy Commissioner-i department aser agency balala dang iba sentong nung shilem agütsü aser amalitep akatsü ayongzüko.

DoH&FW ajanga nüburtem dang tekumdangtsü metetdaksür

Dimapur, Tsüklai/February 16 (TYO): Nüburtem lendong timtem balala nungi kumzüka alitsü aser özüng nung aliba ama inyaksü mechi Drugs Control Administration, Directorate of Health & Family Welfare, Kohima ajanga nüburtem ajunga nem teinyaktsü aser tekumdangtsü balala metetdaksü.

Mozü aliba ajunga atema cash memo/ credit memo meshitsüla, kechiaser tarutsü nung bushisüngdangtsü atema itemji legal documents lir.

Drugs License aliba pharmacy nungi dang mozü alitsüla, anungji ONDLS portal nung third party verification ajanga jangjatsü.

Registered Pharmacist ajanga mozü agütsüba Pharmacy nungi mozü alitsüla, shirnok uniform (white coat/apron) semer tenüng aser registration number inoka alitsü, ta ashi.

Drugs Reaction mesüra side effect tesashi lira Toll free number 1800 180 3024 ajanga osang agütsütsüla.

Side effect lira mesüra mozü

chir temang nung mapa inyakba melira Chief Medical Officer Office kübok District Drugs Control Administration unit nem osang agütsütsüla, aji asünung dang nüngdakba bushisüngdang asütsü.

Teti Brand & Generic tenüng (e.g., "Panadol" (Brand) /Paracetamol (Generic)); Manufacturer tenüng & Address; Batch Number, Manufacturing Date, aser Expiry Date amala repringtsüla. Kodanga liwar aliba mozü mamshitsüla; Dosage tashi metettsüla; cover, label amala nung totuyuba agüja aliba ama mozü tem ayutsüla, ta ashi.

Mozü amshitsü asoshi Registered Medical Practitioner nungi prescription agütsü ya Drugs and Cosmetic Rules indang Schedule H aser H1 kübok özüng lir, anungji Physician prescription mesüra consultation magi iba ama mozü kodanga malitsüla, kechiaser iba ama mozü ya shidak nung mamshira temang asoshi lendong lir, ta department sangdong ajangasa ashi.

ADC Mokokchung ajanga metetdaksür

Dimapur, Tsüklai/February 16 (TYO): 28-Koridang Assembly Constituency atema Electoral Roll indang final publication asoshi list of amendments renema lir. Ibai 01-01-2026 ya qualifying date ama aser Registration of Electors Rule, 1960 nung aliba ama lir, ta Additional Deputy

Commissioner & Electoral Registration Officer, Mokokchung, Atsüngba Walling ajanga sangdong ka nung metetdaksü.

Iba Roll indang copy den ashiba list of amendments ya adokogo aser repringtsü atema pa indang office nung angutsü, ta sangdong ajangasa ashi.

Gender sensitive budgeting & outcome budgeting training tenzüka



Dimapur, Tsüklai/February 16 (TYO): Gender sensitive budgeting & outcome budgeting training ka Administrative Training Institute, Kohima nung February 16, 2026 nü tenzüka liasü. Iba training ya Planning & Transformation Department den lungjemer agizüka liasü.

Development Commissioner, Government of Nagaland, Tamsunaro Aier, IAS ajanga sentong tenzüka Gender Responsive Budgeting (GRB) indang jembidang iba training nung ketdangsürtem adenba ajanga Nagaland sorkari planning aser budgeting tajungba yanglutsü temulungtetba sayur ta ashi.

Jenang kasa nung ajak asoshi terenlok atema gender equality aser women empowerment ya tongtipang lir ta lai ashi.

Sentong yanglua bendanga agütsür inyaksü ya tongtipang lir aser itemji kanga junga sentong yanglua senotsü teperi

agütsüba ajanga temelenshi bener arutetsü aser iba atema budget ya sorkar indang policy instrument tashi tulutiba lir ta ashi.

Gender Responsive Budgeting ya tetsürtem atema budget balaka masü aser tetsür aser tebur tsüngta senotsü kasa sadangba indanga masü. Ibai 'gender lense' nungi sentong aser budgets asadanga tetsür aser tebur, tetsürchanu aser teburchanu nüngdak balala nung agütsütsü asoshi resources agütsütsü indang lir.

Iba yagi senotsü tali kumdanga aser temelenshi tali arudakja amshidaktsür. Nagaland nung gender budgeting ya 2009-10 nungi tenzüka aser Planning & Transformation Department ya Nodal Department ka ama department balala indang sentong nung gender perspectives inokba nung lenmang sayua arur, ta Aier-i ashi.

Department temi shilem

agiba nung terenlok aliba jangjaba nung yaritsü asoshi Gender Budgeting Cells ya tentet.

Iba training indang nükjidong ya awareness agüja officers nem practical skills agütsütsü aser planning, budgeting aser monitoring nung 'gender concerns' loktepdaktsütsü atema lir.

Iba yagi sentong balala beneficiaries atonger asü masü mesüra resources ya tim yimya nung amshir asü masü ta jangjatsü nükjidong nung ayongzüka.

Gender Responsive Budgeting ya department ka kisüng inyaksü asoshi masü. Department ajak yangi shilem lir, ta lai ashi.

Lai ajak dang iba sentong nung temulung agüja shilem agia pei tangatetba lemsateptsü ayongzüka liasü.

Anogo ana training nung shisalen sayur Joint Secretary (Rtd) Government of India, Rajesh Saxena alitsü.



February 16, 2026 nü Amaravati nung Andhra Pradesh Chief Minister, N Chandrababu Naidu den state ketdangsertemi taoba mapang Microsoft CEO, Bill Gates den senden amendang tangokba noksa nung angur.

Bengaluru nung 6buba India-France Annual Defence senden amentsü

New Delhi, February 16 (Agencies): February 17 nü Bengaluru nung Defence Minister Rajnath Singh aser France Minister of the Armed Forces & Veterans Affairs, Catherine Vautrin na leniba nung 6buba India-France Annual Defence senden amentsü, ta Ministry of Defence-i sangdong ka ajanga metetdaksü.

Iba senden nungji linük ana tsüngda defence dak sendakba sector balala nung amalitepa inyakba jenjang asadangtsü aser industrial tsütsü taliba amalitepa inyaksü atema jembitsü, ta kasa sangdong ajanga metetdaksü.

Iba senden nung defence

cooperation agreement ano küm 10 atsülangtsü atema tezüngzüktep agitsü imlar, ta ministry-i metetdaksü.

Defence minister ana matsüngdang linük anati senteper Hammer missiles yanglutsü atema tezüngzüktep agitsüa akok.

Kasa anogo nung Ato kilonser, Narendra Modi aser France Tir Emmanuel Macron nati video conferencing ajanga Karnataka kübok Vemagal nung H125 Light Utility Helicopter Final Assembly Line semzüksütsü.

India aser France na tsüngda tesendaktep nung Defence ya tongti tongshi ka lir.

2023 küm July ita nung

Bastille Day Parade nung tetushi tejaoker asütsü atema Modi jaoka liasü aser 2024 küm India nunger Republic Day Parade 2024 nung tetushi tejaokerji France Tir Emmanuel Macron liasü.

India aser France sepaitemi mapang shia külem exercise asem agir, aser itemji -Exercise Shakti (Army), Exercise Varuna (Navy) aser Exercise Garuda (Air Force) lir.

Yaküm October 12 nü Catherine Vautrin-i French Defence Minister tenangzükba agiba sülen tang mezüng lai India semdangtsü.

Taoba India-France Annual Defence senden ya France nung ayongzuka liasü.

UP nung nija hospital 178 indang license thinentsüogo

New Delhi, February 16 (Agencies): Uttar Pradesh state sorkari nija hospital 178 indang license thinentsü, ajisüaka tim ketdangsertemi asadanga sülen hospital 59 nembo tanaben license agütsüogo, ta Hombarnü Deputy Chief Minister Brajesh Pathak-i metetdaksü.

State nung hospital 281-i telatetba shidak mebenshir ta tashishiba ken o agütsüba sülen ketdangsertemi item hospital mita ao, ta pai assembly nung metetdaksü.

Nija hospital tem anema

benokba ken otem dak sendakba nung Samajwadi Party MLA Atul Pradhan-i asüngdanga langzüdang minister-i, "Onoki hospital 178 indang license thinentsü. License thinentsüba sülen hospital temi ketdangsertem nem temepishiba agütsüba nung ajemdaker hospital 59 nem tanaben license agütsüogo," ta metetdaksü.

Deputy Chief Minister Pathak-i Medical Health portfolio-a repsema abener.

Iba dak alia hospital 1,542 dang telatetbatem shidak

benshiang ta tuyuogo, ta pai ashi.

Nija hospital temi bill tali meshir, anungji consultation fees aser medical test atema fees liromedemtsütsü tebilemba ali asü?, ta asüngdanga langzüdang Pathak-i, nija hospital tem nung doctor tem consultation fees liromedemtsütsü mesüra medical tests fees liromedemtsütsü tebilemba mali, ajisüaka sorkar hospital tem nungbo angati treatment agütsür aser mozü-a angati agütsür, ta metetdaksü.

Paisa, Ayushman Bharat Pradhan Mantri Jan Arogya Yojana (PMJAY) scheme kübok beneficiaries nem sen lakh 5 jenjang treatment agütsütsü, ta shisem.



February 16, 2026 nü New Delhi nung Chief of Defence Staff General, Anil Chauhan-i Commander of United States Indo-Pacific Command, Admiral Samuel John Paparo aser tangartem den senden amendang tangokba noksa nung angur.

PM Modi-i February 25-26 anogotem nung Israel semdangtsü

New Delhi, Tsüklai/ February 16 (Agencies): Ato kilonser Narendra Modi-i February 25-26 anogotem nung Israel semdangtsü.

Major American Jewish Organizations nung Tirtem conference nung Israel Ato kilonser, Benjamin Netanyahu-i, "Parliament nunga jembitsü. Taruba hopta shibai semdangtsü? Narendra Modi," ta metetdaksü.


"Israel aser India na tsüngda tesendaktep kanga junga lir aser onoki lenla aika nung amalitepa inyaksü atema jembitsü. India ya linük tilaka masü ta nenoki meteta dang lir. Iba linük nung nütsüng billion 1.4 lir. India ya tashitait linük ka," ta pai metetdaksü.

Ato kilonser Modi-i Israel semdangba mapang Knesset (Israel Parliament) nunga jembitsü aseer linük ana dak sendakba onük balala nung o lemteptsü.

2017 küm July ita nunga pai Israel semdanga liasü. India nunger Ato kilonser inyaka arurtem rongnung Yihuda nunger linük mezüng semdangsangji Modi lir.

Yaküm Israel Tourism Minister Haim Katz, Economy & Industry Minister Nir Barkat, Agriculture & Food Security Minister Avi Dichter aser Finance Minister Bezalel Smotrich nungeria Inda semdanga liasü.

Finance Minister Bezalel Smotrich-i semdangba mapang nung linük anati



Bilateral Investment Treaty (BIT) tezüngzüktep agi, iba sülen Terms of Reference (TOR) renem. Yaküm November ita nung Commerce and Industry Minister Piyush Goyal-i Israel semdangba mapang nung linük ana tsüng Free Trade Agreement (FTA) atema jembio.

December ita nung External Affairs Minister S. Jaishankar-ia Israel semdanga Ato kilonser Netanyahu, Tir Isaac Herzog aser Foreign Minister Gideon Sa'ar nunger ajurua liasü.

Yaküm November ita nung India aser Israel nati defence, industrial aser technology tsütsü amalitepa inyaksü atema bangjema liasü.

Yaküm November ita nung Tel Aviv nung India aser Israel Joint Working Group (JWG) senden mena liasü. Iba senden nungji Israel Ministry of Defence (IMOD) Director General Maj. Gen. (Res.) Amir Baram aser Indian Defence Secretary Rajesh Kumar Singh na leniba nung ketdangsertemi shilem agi.

FORM NO. 14
[See Regulation 33 (2)]
OFFICE OF THE RECOVERY OFFICER - III
DEBTS RECOVERY TRIBUNAL GUWAHATI
Suvarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati-781007 (Assam)
DEMAND NOTICE
(RECOVERY OF DEBTS & BANKRUPTCY ACT, 1993 KÜBOK
SECTIONS 25 NUNGI 28 TASHI ASER INCOME TAX ACT, 1961
NUNG SECOND SCHEDULE KÜBOK RULE 2)
RC/227/2021
PUNJAB NATIONAL BANK (UNITED BANK OF INDIA)
Versus
MR Y. BANKATHUNG LOTHIA
To,
(CD 1) Mr Y. Bankathung Lotha, Resident of Nagarjan Kuda Village,
Opposite Spirit of Faith Church, P S and P O Dimapur Nagaland- 797112
(CD 2) MR P ANGAMI, R/O Nagarjan Kuda Village, Opposite Spirit of
Faith Church, P.S. and P.O. Dimapur, NAGALAND -797112
OA/196/2020 nung DEBTS RECOVERY TRIBUNAL GUWAHATI nung
Presiding Officer-i tetuyuba agütsüba nung ajemdaker Recovery
Certificate nung aliba ama na (Jointly and severally/Fully/Limited) anema
sentsüh **Rs. 64,51,841.05 (Rupees Sixty Four Lakhs Fifty One
Thousand Eight Hundred Forty One And Paise Five Only)** den
pendentellite aser sentsüh mouma tashi future interest @ 13.25%
Simple Interest Yearly w.e.f. **01.05.2020 nungi 15.12.2021** tashi aser
costs **Rs.119173 (Rupees One Lakh Nineteen Thousands One
Hundred Seventy Three Only)** lir.
1. Recovery Certificate nung aliba sentsüh: Rs. 64,51,841.05
2. 01.05.2020 nungi 15.12.2021 tashi interests @ 13.25% Rs. 19,54,800.30
3. Costs Rs. 1,19,173.00
Rs. 85,25,814.05
Recovery (-) Rs. 00.00
Rs. 85,25,814.05
2. Iba notice agütsüba sülen anogo 15 tsüngda tekalen shia aliba senji
agüjang ta tuyur, mesüra Recovery of Debts Due to Banks and Financial
Institutions Act, 1993 aser Rules nung ajemdaker sentsüh alangzüksü
atema inyaksangshitsü.
3. Taruba ken o angadangtsba anogo matongdanga affidavit ka nung
nü kiojen sangdongang ta nü dang tuyur.
4. Maneni ken o angadangtsü atema **27.02.2026** anogo nung anepdang
10:30 ako nung tsünglanglen sign süa alir matsüngdangi arung ta tuyur.
5. Tekalen shia aliba sen dak alia nai item ya-a agütsütsüa akümtsü:
(a) Certificate notice agütsüba/ execution proceedings mapang nungi
tenzüka sen tetemlok.
(b) Iba notice aser warrant agütsüba den külemi sentsüh alangzüksü
atema inyaksangshidang indokba costs, charges aser expenses ajak
agütsütsü.
**Iba anogo: 12.12.2025 nung tsünglanglen kü meyongnem aser
Tribunal seal agütsür.**
Sd/- Recovery Officer-I, Debts Recovery Tribunal Guwahati



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (TSÜKLAI) 17, 2026

Bangladesh nung putu tasen

Bangladesh nung Sheikh Hasina-i aniba Awami League government agi Bangladesh nunger lanurtem laktetadoker 2024 küm ain adoka longkak aitba metizükteti la pei lima toktsür jena aoba sülen, tang küm ka ser tesadang ka sülen Bangladesh National Party (BNP) teloki election nung takok tulu ngur government akümtsüba ya, atangji, government tasen ka akümba dang nungi taoba aser tuluba, Bangladesh asoshi putu tasen ka tenzüker asütsü. Bangladesh ya Muslim lima ka süaka tetsüri dang mapang talangka yimsü süa arur külen, tang teburi yimsü asü tenzüksü. Atangji, tang BNP telok nungi Bangladesh ato kilonser (Prime minister) akümtsü shimteta alisang. Tarique Rahman ya taoba mapang anaben tashi Bangladesh ato kilonser inyakla Begum Khaleda Zia'er jabaso lir, anungji nisung tasen süaka yimsüsür kibongbo tejen nungi senmanger aruba amai ka lir. Ibayongji, pei tsürabur mapang inyaksaba mapatem ajak toktsür, nisung dang masü saka putu tasen nung lenisüba aser tangatetba tasen aser ochi nung Bangladesh lima yanglushia aotsübaji pa asoshi kanga tongtibang asütsü. Pa ya tetsü Khaleda Zia-i aniba government mapang ochimashi mapatem inyakba anema Awami League government arur külen, Sheikh Hasina-i puoka ayutsü tsübua pei lima toktsür oa London nung küm 17 jenoka lir külen, yaküm 2025 küm December 25 nü-ang pei limai meyipa aru aser pa arur anogo pongunübuba nung December 30 nü tetsü Khaleda süa adok. Tarique Rahman pei limai meyipa arutettsüsa atalokbaji 2024 küm Bangladesh nung lanurtemi Awami League government atsüngdokba dang masü saka Sheikh Hasina dena pei lima toktsür jena aotsüsa aküm aser iba sülen khen atema lanurtemi mulungba government ka kümteta aliba ajanga liasü. Aji oda, tang Bangladesh nung government tasenba asoshi teinyaktsü tongtibangtibaji lanurtem tebilemtsü angateta, ano tanaben Sheik Hasina mapang amato mataloktsüsa inyaktsübaji asütsü. 2024 küm Bangladesh lanurtemi par government anema ain adokba kuliji lanurtem asoshi mapa inyaktsü maongka magütsüba ajanga liasü. Bangladesh nung government mapa adok shia shilem tulubalenka Bangladesh yimten nüchi asoshi taküm bendanga agüja rararatem asoshi shiteta yutsür, anungji tanünga jagi temsüa alir lanurtem aika mapa agi matar. Iba nung jagi tenzüka lanurtemi Shiek Hasinai aniba Awami League government anema apuso aser tang la India nung jenoka lir. Atangji, iba amaji government sentong anema apusobaji Bangladesh nunger lanurtem asoshia jenjang tasak aser lendong tulu liasü, kechiyong iba mapang Bangladesh sepaitemi injang yoka khasetba lanurtem ajak agi nisung meyerijang ka ser noklang pezü dak tali liasü. Ibaji kodang bilemdangdir, tang BNP akümba Bangladesh government tasenba ya Bangladesh nunger lanurtem zü agi alangzükba government liasü. Ashiko, iba tiaji angatetba agi, tan election Bangladesh tatar menden 300 nungi BNP teloki menden 212 nguaka, parnoki takok anguba tepela benjong ayongzüka jajatsü mayongzük saka sarasadem mapang agitsüang ayongzük. Ibaji government makümdangyongi BNP lenir Tarique Rahman-i kanga shisa kaa inyakba mapa ka asütsü. Tang Bangladesh government tasenba nung tatar 300 rongnungi tatar noklang ana ser tuku tashi tasen purtem lir. Aji dang masü saka government nung lenir ato kilonser asütsüba nisung Tarique Raham-jia tatar senden nung mezüng asütsü aser ano opposition telok Jamaat-e-Islami telok nungia lenir Shafiqur Rahman-a mezüng tatar senden nung mendanger asütsü. Iba jagi Bangladesh asoshi teimla tajung ka sayur, kechiyong tatar tasen purtemji lanurtem lir, parnokji temeteter aser shisatsü temerük purtem, anungji parnoki pei lima asoshi tajung inyaktsü bilembaji inyaktettsü. Joko, Bangladesh süngjemtsü asoshi lanurtem nem mapa agütsütsüla aser nübortem libaliro nung timmedemi alitsüsa, bendanger kintem den tesendaktep yanglushir, rongsenren jenjang tajungba küma yanglushi tenzüksüla. Atangji, Sheikh Hasina nem tasüba temerenshi agütsütsü obendang agüja lir, saka BNP asoshi ibajia tarutsü Bangladesh asoshi ano khen kanga junga bilemdangtsü nüngdaktsü.

OLEMSABANG

AKÜMLIR MONGJEN :

- Talitemjen Imchen

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yash adok nungi...)

Liyunga aruba mapang, kibong nung shilumanem tenzü. Kidang kinüngtsü Sangrona-i anir jalajabaso ajak shirang. Kibong-i shilumanem aruba ji, yimertem-i mebenshiba yimya, Lijaba anioker aliba agi ta pai rasarapong mali, tongmelanga lemtet agi. Pai Lijaba aniokba atema kanga sasa bilemer, tejashi nung tzüin-i lua meshi ka yanglu aser chipo aonpo bener lua yutsür Lijaba dang, "Tzüin-i lua liang, idakji na atema nüngdak oset teperi yutsüogo" ta ashi. Saka iba sülenjia kibong nung shilumanem kasa dang ali. Joko Lijaba den teti asoshi pilaa ali nungang, kibong nung shilumanem ji aneptsü ta bilemer, kenübo pai An ka bener lenmang nung tezüngji petdokyunga, "Obou among (lushi) ji tajungbar na iba jagi oa alitsü arung" ta Lijaba ji mesüzüker among jagi anir ao. Pai among ji tonger külen An tekongji alangdok aser azü ji rükshia yimdokja Lijaba ji meinoktsür, idakji An shi ji soa achi. Joko Lijaba meindokerji kibong nung kinüngtsü aser tanurtem shirang aneper alitsü ta bilema, timla tulu nung adoka ki atong. Saka shilumanem akhi ama kasa dang liasü. Tasüng nü, among jagi Anpong ka bener oa, tezüngji petdoka Lijaba dang jashia ashi. "Na nisungsangla den külemi senzüa anasatepa aliba agi, ozü kibong shilumanem-i dang alir." "Tanü nungi onok senzülen kecha nunga na mesenzütsü," "Na süng tuluba nung ia liang," "Long tuluba nung ia liang," "Tsüchi ji ne talidak süang." "Tekong, tarok, atang, longren longpangtemji na senzülen süang" ta adakatemer Anpong tekong ji alangdok. Iba sülen Lijaba nem agütsür ama, mesüshia Anpong azüji rükshidaktsür shi ji sor, Lijaba nemjibo akhi ama kecha kenteta meyutsüi ajakji pai chimaa achi. Iba nüjibo Lijaba jashir, "Nai ni kanga arishirji, joko ni nüngdakba shia kü den ajuruteptsü, iba makang nung tenla bener arua ajurute pang" ta makang ka daker amrong ka nung merepdoka doktsür oadok. Pa amrong jagi ia makangji bener adok dangbo, Lijaba tesem nungi oadoker liasü. Pa alidak tesem ji kanga azünger, akhi ama telemla ka mali, pa tenarong nung tsüngdangpi akong aser temang ajak nung asükjang meronga aküm. Lijaba ji koleni aoar metettsü atema, bushia odang nung tatsüka dang orbo, Lijaba tsüngsü ji mangu remaa aküm.

Pa kanga aoksar tetsübu nung kidang-i adoker, kinüngtsü aser tanurtem dang ashi. Lijaba tsüngsü samar külen, metet meteta kibong ji azünga aküm. Saka kibong shilumanem jibo kasa dang ali. Pai anosa kibong nung shilumanem anentsü asoshi, taneptsü lenmang balala nungi bushidang. Saka mangu. Joko shisabulu khuret agi aonung dena amoa motet pa nükena aküm. Kibong nung shilumanem dang masü telemla ka mali, kiji talitsü majung azüngazünger. Pai kinüngtsü aser tanurtem den külem-i takdang nungji memejangi, pa kisüng atep nung meshi anasa mejang. Kibong nung shilumanemtem anema pongdoktsü asoshi bilemdang, chi mechiyonger, tsü majemer, yakta dang pa temang ji züklazükklar tekongra ka dang kümadok.

Konung ka pa tashi ajak lular, mejanga masü memejanga masü ta an nükma ka, nükla dangi Lijaba aru. "Lijaba dakbo sayatenya lir ji, pa dangi oa mepishi nung aneptsütettsü" ta pai shisatet. Tasüng nü yakta saaker Anpong ka bener arem jagi ao. Pai Lijaba den piladak amrong anasa ji nokdaker, "Obou ya na chiang" ta shia Anpong ji taküm chiok. Saka iba nüjibo pai doktsüba ama dang aremji azüngazünger liasü aser taoba mapang ama sayatenya kecha mangu. Pai Lijaba meindokdang tejashi nung kechisa ashi, ajakji bilemdanga kechi nungang alitsüar memetet rataa ali. Iba mapang, Lijaba-i pa amrong-i ia, am ji agizüker amsü ajanga bushitsü nükla dangi arudaktsü. Pai amrongi ia am südang nung, Lijaba ji among (lushi/ lumang) balakati oadoker liasü. Lumang ji bushia or ano am ji südang nung, pa anasa aliba long tulu kati Lijaba ji ir liasü. Pai tamalen Lijaba-i sayuba ama makang ka adak aser makang nungji entsü inoka bener lumang jagi oa long ji külem. Long külem dangji kibong nung shilumanem ajak aneptsütsü mepishi aser akhi ama kiset shirurutem aser tsünüsempongtsütem nung azükarua alitsü ashi. Iba sülen Lijaba-i langzüdisü melangzüliir ta, pa temulung nung terata agi sünger ki jagi adok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Maryland nung tepuokdak tetsür 16 denseman nisung 54 bapti



Maryland nung aliba county jail 'Prince George's County Department of Corrections' nung tang mezüng baptiba mapang tangokba noksa nung angur.

February 16, 2026: Maryland state nung aliba county jail ka nung nisung 50 dak temai yimjak nung Yisu Khrista agizükba sülen baptiogo.

Iba jail nungji tang mezüng baptiba sentong agi.

Prince George's County Department of Corrections nungji tetsür 16 aser tebur 38 bapti. Baptiba sentongji prison group Moving Forward Ministries-i agia liasü.

Jail ketdangsertemi Instagram ajanga, "Gymnasium nung agiba baptiba sentong

nungji Arogo nung lenirtem, Khristanem aser county nung lenirtem liasü," ta metetdaksü.

"Iba sentong takok ngua agitetba atema Department of Corrections-i community partners dang pelar," ta parnokisa metetdaksü.

"Tang mezüng iba agency nung baptiba sentong agiogo aser iba ya tatembang masü saka tetenzüker asütsü. Tepuokdak alirtem nem tesayuba agütsütsü aser baptitsü atema telemtetba agitsü asoshi parnok nem

maongka agütsütsü. Baptiba sentong ya mapang shia agitsü," ta jail ketdangsertemisa metetdaksü.

Osang angazükba agi, tepuokdak alirtemji baptiba mapang nung temeremso sentsü süoshi masü saka süoshi temesüng semdakja liasü.

Tesüiba küm ana tashi Moving Forward Ministries-i hopta shia jail nung sentong ayongzüka katsüogo. Mezüngbo item sentong nung tepuokdak alir 12 dang aden saka tangbo nisung 100 dak tali adener.

Odisha nung Khristan ka tasü mang aremtsü temelaba magütsü

February 16, 2026: Odisha nung tainlonglong Khristan ka asüba sülen yim dak Hindu nungertemi tasü mangji aremtsü memela.

Hindu nungertem jagi par kibong dang Khristan yimsü tokjang ta takhangba agütsü.

Nabarangpur district kübok Kapena yim dak arrshi küm 13 Khristan, Ayush Santa asü saka February 14 nü Hindu nungertemi tasü mangji leper nung aremtsü memela.

Parnoki Khristan kibong dangji, nenoki Khristan yimsü toktsü nung ang tasü mangji aremtsü atema temelaba agütsütsü, ta ashi.

Santa ji tezüngjang agi mapa meinyaki süadok.

Yim dak Khristantemi tashishiba ken o agütsüba sülen district ketdangsertemi police 40 shi yok, ta Nabarangpur Christian Minority Council secretary, Gourab Kauri-i metetdaksü.

Ajisüaka police-i mangatettepji bentettsütsü mekoki liasü.

February 15 nü osangbener den jembidang Kauri-i, "Hindu nungertem jagi tasü mangji par kibong nija li nunga aremtsü memela. Tesülen tasü mangji yim among adener tesem ka

nung arem," ta metetdaksü.

Arogo lenirtemi ashiba agi, Khristan yimya nung asüpila sentong magitsü saka tongmelang sentong ka dang agia tasü mangji aremtsü nangzüka document ka nung sign asüba sülen ang tasü mangji aremtsü mela. Leper nungji Kangki densema Khristan temaitsütem-a meinokdaksü.

United Believers Council Network of India nungi putir Pallab Lima-i, "Tesüsa Ayush Santa tasü mangji Khristan tasü mang ka ama mezüngshii mesüra sarasadem magii arem," ta ashi.

Nabarangpur nung deputy district magistrate, Tapan Kuntia-i, tensa azüoktsü atema police security agüja tasü mangji ayaterm süiba sülen ang arem, ta ashi.

Odisha nung talisa tribal nütsüng aika aliba district tem-Nabarangpur, Koraput aser Malkangiri nung Khristanem tasü mang aremtsü memelar aser Khristanem dang Khristan yimsü tokjang ta akhanger, ta Arogo lenirtemi metetdaksü.

National Christian Front nung general secretary, Ismail Patro-i, "Tasü mang remdaksütsü atema pei yimsü

toktsütsü akhangbaji linük temzüng kübok senso ka temeden anema lir, kechiyong linük temzüng ajanga ajak nem yimsü temeden agütsür," ta ashi.

Santa'er kibong ya Blessing Youth Mission Church nung züngsem lir. Taküm January 25 nü telok kati iba Arogo maaka liasü.

Lokti jagi iba Tenla ki rongdoksütsü amokmeren aser yimtsüng nungi Khristan kibong 30 shi meindoka liasü.

Yaküm March ita nunga Odisha kübok Siunaguda yim dak arrshi küm 85, Keshav Santa tasü mang aremtsü memelai liasü. Par jabaso Khristan asüba agi tasü mangji aremtsü memela, ta putir Lima-i metetdaksü.

Yaküm April ita nunga Melbeda yim dak arrshi küm 20 Khristan, Saravan Gond tasü mang aremtsü memelaba ajanga tesüsa tasü mangji rongdoka liasü, ta Lima-i metetdaksü.

2024 küm October ita nunga Menjar yim dak arrshi küm 27 Dalit nunger Khristan, Madhu Harijan tasü mang aremtsü memelaba ajanga par kibongi Khristan yimsü toktsütsüsa aküm, iba sülen ang tasü mangji arem, ta paisa metetdaksü.

ANOGO ABEN TSÜNGREM DEN

Taküm tzü talubosa

"Aser Pai kü dang ashi, item atalokba Ni Alfa aser Omega, Tetenzük aser Tatembang. Tsüraba nem Ni taküm tzü tzüpokdak angati dang agütsütsü".

J. Adok 21: 6.

Tebuji taküm tzü tzüpokdak. Kibuba Yisui Pa asüba aser shia aruba ajanga iba süngkümüji lapoktsü. Tanela Temeshii iba ayong jagi anir aser ajemtsü aser tzüra atemtsü ayonger.

Tzüraba pur ajak Yisui ajar, aser Pai Pei taküm ayong ka ama agütsür. Kari marok bener arur aser aji sünga bener aor. Kari tzüpong tulu bener arua sünga tatener. Kari arur, aser iba ayong nung temang ajak rema pungoker aser tasü maitertem arua pungoktsü ayonger.

Kari mesüra ajaki arua iba teperiba nungi ajemtsü akok, saka ishikati dang inyaker. Tzü poktetdak anasa alirtemji dang peritsü akok. Kodang yima alur tzü timba akümer aser tenem temtsüng nung alir ajak peria ajemer aser nüngdak ajak peridaktsür. Kodang ayong tzü jagi lenden tongdir, ayongji tesatempa aser tuluba akümer, aser aika ajemer aser pei nüngdak peridaktsür. Yamaji Kibuba nungi adokbaji ishika, aika aser lokti asoshi talubosa lir.

Teburtemi aser tetsürtemi alima nung mulungsü bushir. Shi tepela, rongsen, aser temetetba bushi dang tanela nung tzüraa doktsür. Ajak tazüng arur aser mepelar. Kumtetdakba Khrista shibai kangki nung "ya renemogo" ta ashi, Pai ajak ajar. Pai tzütu ajak yima aoba ayong kümdaktsür. Ne takümjia yima aoba ayong kümdaktsütsü Pai ajar. Nai aji inyaktsü mulunger asü?

Iran nung longkak aitdang Khristan 19 tepset

February 16, 2026: Tawa Iran aginer, ajisüaka ibaji nung nüburtemi longkak aitba mapang nung Iran ketdangsertemi longkak aitertertem anema tashiyim amshiba ajanga nisung meyrjang aika tepset aser asürtemrongnungji Khristan 19 densema aliba jangjaogo, ta Article 18-i metetdaksü.

Iran nung yimsü temeden atema inyakba organization, Article 18-i, "Longkak aitba mapang nung Khristan 19 tepsetba jangjaogo, aser Khristanem rongnung Armenian aser Assyrian Khristanem aser Muslim yimsü toktsür Khristan yimsü agizükertema densema lir," ta metetdaksü.

Taoba ita longkak aitba mapang nung ketdangsertemi tashiyim amshia sepaitemi January 8 nü Iran nunger Khristanem-Nader Mohammadi aser Zahra Arjomandi nata khaseta liasü, ta Article 18-i metetdaksü.

Mohammadi ya tanur asem tebu liasü. Babol yimti nung pa khaset. Arjomandi ya tanur ana tetsü liasü aser la Persian Gulf island of Qeshm nung khaset, ta Article 18-i metetdaksü.

Article 18 executive director, Mansour Borji-i, "Tanü Khristanem densema Iran nunger nisung million aikati nüchiso aser ochi temeden

alanzüktsü jenjangji kanga tasak, ta parnoki meteta lir. Küm shia Iran nung Khristan aika pua tepuokdak ayur aser reshikangshir, aser ibaji pei yimsü temeden amshiba agi lir. House church nung sarasademba-a ozüng alema inyakba ama züngshir," ta metetdaksü.

February 10 nü report ka ajanga ashiba agi, Iran nunger Khristantemi US Tir Donald Trump nem Iran nung Ayatollah yimsüsüba atsüngdokdaksüner. Fellowship of Iranian Christians tentetsang, Shahrokh Afshar-i, "Tang tensa ya kanga majung. Iran ketdangsertemi longkak aiter meyrjang aika tepsetba sülen pai (Trump) langkabosa inyaktsü, ta ajaki kanga imlaa liasü," ta metetdaksü.

Iran nung tesüiba küm aika Khristanem kanga reshikangshia arur, ajisüaka iba linük nung Khristan nütsüng teimba-teimba dang akümer. Iran nung talisa Evangelicals aser Catholics anema inyaker.

US State Department-i ashiba agi, nütsüng million 92 aliba Iran nung tang Khristan nütsüng 500,000 nungi 800,000 tsüngda lir. Ajisüaka Open Doors International-ibo Iran nung Khristan nütsüng million 1.24 shi lir ta asadangteter.

* Motzü nung ajemshia senzura tetsüng nung tzura adoktsü.

1. Aruli, 3. Balala, 5.Suwar,
6. Belem, 9. Sūjak, 10.Aonung,
11. Dokan, 13. Tinu.

**Labour Commissioner cum
Chief Inspector of Factories & Boilers
Nagaland, Kohima.**

Iran-i uranium enrichment yutsütsüla aser tali meyanglutsüla: Netanyahu



Jerusalem, Tsüklai/February 16 (Agencies): US-i Iran dang par uranium enrichment maparen ajunga yutsüdahtsütsü ajungshitsüla aser tali yangluba nokdangtsüla, ta Israel Ato Kilonser Benjamin Netanyahu-i ashi.

Deobarnü Jerusalem nung jembidang pai aginüba conditions kar pai lemsatep aser yangji enriched material ajunga Iran nungi agentsü aser yangji enrichment capability malitsü dena lir.

Mongulbarnü Switzerland nung Iran aser US ketdangsürtem tanaben ajurutepa jembishinütsü renemshiba mapang ka nung pai iba o ya ashi.

US-i sanctions agüja aliba agentsü mulungra Iran-i nuclear deal ka yanglutsü asoshi atsüanem akatsü asadangtsü, ta Iran Deputy Foreign Minister Majid Takht-

Ravanchi-i Tehran nung osangbener dang shia lir.

Ajisüaka Iran-i zero enrichment yabo tamakoktsü aser nuclear non-proliferation treaty kübok par temeden nung aibelenba lir ta ashir.

US-i Iran dang tezüngzüktep ka yanglutsü tsükshia arur aser Middle East nung par mitkar tashi ulushia aircraft carriers ana - warship tulutiba densema - region nung yoka lir.

Region nung timtem ajurutsü aliba American naval forces temi kumzüka ayutsü, ta US Secretary of State Marco Rubio-i Slovakia nung osangbener senden ka nung ashi.

US Tir Donald Trump-i Iran indang-indanga amakba masü saka tesendaktep tajung aser jembishinüa tangatettep kati aruba ang aginer ta pai ashi.

Trump indang special envoy Steve Witkoff aser apang Jared Kushner nati Foreign Minister

Abbas Araghchi densema Iranian negotiators tem den ajuruteptsü lir, shiba Geneva-i otar.

"Shingaia Iran den tezüngzüktep takok ngua yangluba mali, saka onoki merangtsü," ta Rubio-i ashi.

2015 nuclear deal kübok Iran-i nuclear inyaksangshi tataktet ka alitsü mulung aser linük balala nung par maparen reprangdaksü aser iba melen rongsenketzüng tsütsü tenokdangba agüja aliba agiendaktsü.

Tang tesüsa jembishinü akatsü lia Takht-Ravanchi-i osangbener dang ashiba agi, atsüanem akatsü mulunga aliba kuli ka ama Tehran-i 60%-enriched uranium meyoekteptsü ashi.

Highly enriched uranium ya nok-nü yanglutettsüsa jenjang nung lir, aser iba yongji Islamic Republic ya nuclear noknü yanglutsü meranger ta temulung malemer, saka parnoki kodanga magizüker.

Israel-i ano Iran nung ballistic missiles yangluba azüokdaksüner, koba amshia Israel maka liasü.

Tehran-i tang tashi US ketdangsür den par ballistic missile sentong indang jembitsü memulunger.

Taoba mapanga Israel-i Iran dang Middle East nung Hamas aser Hezbollah densema proxy telok tem yariba anentsü shia lir.

N Korea-i rara nung asüba sepai kibongtem atema ki sütsü

Pyongyang, Tsüklai/February 16 (Agencies): North Korea lenir Kim Jong Un-i, bendanglen oa rara nung asüba sepai kinungertem atema Pyongyang nung housing district tasen ka lapoktsüogo. East Asia linük yagi Ukraine den rara nung Russia nem teyari agütsüba mapang tang iba ya atalokogo.

Kim-i ashiba agi, Saeppyol yimtung ya "asen putu atema konang aser Pyongyang aser asen state atema tetushi lir."

Osang nung Russia shisema mali, saka Kim-i taoba hopta Russia tir Putin indang policy aser telemtetba ajak kechi tatidakba makai nongita yaritsü ta tenangzükbä agütsüogo.

Moscow den defence atema tenangzüktepba yangluba kübok Pyongyang-i 2024 küm Ukraine-i sepai meyrejang aika yokogo, ta South Korea, Ukraine aser anüolen aliba linüktem nungi ketdangsürtemi ashi.

Kim Jong Un-i rara nung asüba sepai kinungertem atema ki tasen lapoktsüogo.

Kim-i ashiba agi, sepai kinungtertem nem anisüngzüker tera danga agütsütsü atema pai iba mapang ya anogo kati danga asüyonga takaraba tembangdaksütsü atema

meranga momgshia inyakdaksüogo, ta state meyong Korean Central News Agency-i metetdaksü.

KCNA-i lemsatepba noksa nung Kim den par jala Ju Ae nati rara nung asüba sepaitem kinungrtem den sensak asema aser ki tasentem semdangba nguogo.

Kasa mapang nung South Korea indang National Intelligence Service-i taoba hopta legislator tem dang ashiba agi, Ukraine den rara nung North Korea nung sepai 6000 tepsetogo mesüra yiruogo.

Ajisüaka parnoki kwi asü aser kwi yiru iba indang osang tejangja magütsü.

South Korea indang spy agency-isa, North Korea nunger sepaitem tawa tanü

raraba yimya angazükdar ser Russia-i technical teyari agütsüba ajanga ajangzükdar aser iba ajanga Pyongyang indang weapons systems tajungba kümdaktsütsü akok, ta ashi.

Sepaitem yokba den külemi Pyongyang-i Moscow nem artillery shell, missiles aser long-range rocket system tem agütsür alitsü ta amanger. Iba melena parnok nem sen, military tasatem aser chiyongtsü aser energy shipment tem agütsür alitsü ta amanger.

North Korea-i tawa rara nung asürtem nem tetushi agütsütsü atema yimjak nung sentong aika ayongzüka agia arudar, kong Pyongyang nung memorial complex tasen ka sayaba densema lir.

VACANCY

Marepkong Baptist Arogo, Mokokchung Town

Post	Qualification	Salary & Facility
Music Director	1. B. Th aser tema 2. Diploma aser tema Music agirtem	Rs. 20,000/- & Talidak ki

Temetettsü:

1. Tejangratemi kuli kaket tejangja 18th March 2026 tashi nung agütsütsü akok.
2. 8th April 2026 interview agitsü.
3. Tongteprateptsü atema - 9089777312.

MULUNGNEN O



LT. N. Amongla
03.11.1949 – 31.01.2026

2 Timoti 4:7-" Ni rara tajungji raraogo, Ni alizüing tonga asemogo, ni tamangji yuogo."

Tsüngrem taochi nung pai nungloksüba mapa temer. Nabo iba lima toktsür ogo. Saka onokbo joko tanela tongpangratsür aser len sayur mali kümogo. Saka Nü tamang sarasadem tuo onok den alitsü tamang ayur.

Asür Mrs. N. Amongla ajungbena asüba nung shirnokisa nübo, rongsen, sarasadem aser tesüneptsü o tajung ajanga onok yariogo, Lokti, kibong kija ajak dang kangasa pelaba lemsateper. Asen teyanglur-i nenok ajak moajang ta ozü sarasadem.

Ajak tenüing nung lokti kar tenshia pelaba lemsateper:

1. Chumukedima Ao Baptist Arogo
2. Kohima Ao Baptist Arogo
3. Kumlong Baptist Arogo, MKG
4. Mokokchung Town Ao Baptist Churches Mission
5. Sungkomen Baptist Church, MKG
6. Mokokchung Compound Baptist Arogo
7. Artang Baptist Arogo, MKG Town
8. Marepkong Baptist Church, MKG
9. Chumukedima Ao Baptist Arogo, Women Ministry
10. Wokha Town Ao Baptist Arogo
11. ABAM
12. Aoyimsen Baptist Church, Karbi Anglong Assam
13. Lotha Baptist Church CMD
14. Sumi Baptist Akukuhou CMD
15. Nükmen Baptist Arogo Darogapathar DMP
16. Aoyimti Baptist Arogo
17. East Dimapur Ao Baptist Church, Purana Bazar
18. Yimkhiung Baptist Borü CMD
19. Model Village Ao Baptist Arogo, 5th Mile
20. Town Baptist Church CMD
21. Aoyim Baptist Arogo CMD
22. Ao Baptist Arogo, PadumPukhuri
23. Sovima Ao Baptist Arogo
24. Ao Baptist Church Diphupar
25. Kohima Chuchuyimlang Senso Telongjem
26. Langpangkong Senso Telongjem Kohima
27. Kohima Aoer Telongjem
28. Northern Angami Youth Organisation
29. Dimapur Area Alaba Asotsür Telongjem
30. Chumukedima Mongsenyimti Sarasadem Telok
31. Chumukedima Langpangkong Senso Telongjem
32. Chumukedima Ongpangkong Tetsür Telongjem
33. Chumukedima Yaongyimsen Union
34. Chumukedima Chuchuyimlang Telongjem
35. Ao Senso Telongjem CMD
36. Eastern Nagaland Peoples Union CMD
37. Mopungchuket Senso Telongjem CMD
38. Ao Youth Forum, Diphupar
39. CMD Ongpangkong Kaketshir Telongjem
40. Ungma Senso Telongjem DMP
41. Ao Senden, MKG
42. Dimapur Area Chuchuyimlang Senso Telongjem
43. Chuchuyimlang Riongsanger 6th Buba Sungpo Zunga DMP
44. Ongpangkong Senso Telongjem
45. DMP Langpangkong Watsü Telongjem
46. Ao Lanur Telongjem, CMD
47. Watsu Telen , CMD
48. Watsü Telen, Kohima
49. CMD Area, IEF Unit
50. Ao Student Union, CMD
51. Dimapur Ao Youth Org.
52. CMD District Lotha Hoho
53. Nihoto Ao Baptist fellowship
54. CMD Ungma fellowship
55. DMP Area Chuchu fellowship, CMD Unit
56. Teyong Mopu, DMP
57. Police Referral Hospital CMD
58. 1st NAP M.T Platoon
59. Dr. Neiphiu Rio, Chief Minister of Nagaland
60. Shri. Jacob Zhimomi Minister PHED & Cooperation
61. Shri. Tongpang Ozukum MLA & Advisor water resources Govt. of Nagaland
62. Mr & Mrs Imkongmar Advisor Minority Affairs & Sericulture
63. Shri. Nuklutoshi MLA, CMD
64. Mr & Mrs Neiba Kronu, Kohima

~ Temeim Jabaso aser Kinungertem

Steve Smith Australia squad nung züngoksemogo



Tsüklai/February 16, 2026 (Agencies): Australia indang T20 World Cup squad nung Josh Hazlewood melena Steve Smith shimogo.

Smith ya taoba hopta Sri Lanka atong aser International Cricket Council-i pa züngoksemtü atema temelaba agütsüba sülen Squad nung adentsü atema temsüa kuma liasü.

Mezüngbuba Hazlewood melentsü atema Sean Abbott jaoka liasü, saka pa ya squad nung officially mezüngoksemi

liasü aser iba ajanga asayar ka shimtsü asoshi maongka agütsü.

Australia Captain aser opener Mitchell Marsh Colombo nung batting practice asüba mapang yiruba sülen Smith ya taoba hopta ajungbena jaoka liasü.

Marsh shiba Australia team mezüngbuba asaya ana nunga masayai liasü, pa Hombarnü asaya nunga masayatetsü akok tang bilema Smith züngoksema liasü.

"ICC inyakyim nung squad

ka nung asayar melentsü atema asaya ka masaya tsüingda anogo ka jelia osang agütsütsü latetja lir," ta Australia selector Tony Dodemaide-i ashi.

"Steve idaki lir aser Mitch aser Marcus Stoinis na asayatetsü masayatetsü mejangjaba mapang ka nung pa nüngdakra asaya atema shimtsü asoshi temsüa lir," ta paisa shisem.

Smith ya Australia nunger asayar tejentiba rongnung ka lir aser pai spin ball kanga junga asayateter.

Big Bash League nung opener ka ama pai kanga junga asayaka pa T20 World Cup squad nung mezüngoksemi liasü.

"Smitty idaki arua lir, anungji asayatsü maongka ngura pa renema alitsü. Pa professional ka lir," ta Australi nunger all-rounder Stoinis-i Deobarnü Kandy nung osangbenertem dang ashi.

Australia team nung pacers Pat Cummins aser Hazlewood na yiruba ajanga team nung tapok adokogo.

Power-hitter Tim David-a December ita hamstring yiruba tawa-ang asaya tenzükgogo aser Stoinis Zimbabwe makokba asaya nung fielding amenba mapang teka yiru.

T20 World Cup: Afghanistan-i wicket 5 agi UAE akok

Tsüklai/February 16, 2026 (Agencies): Hombarnü United Arab Emirates wicket 5 agi akokba asaya nung Afghanistan nunger asayar Rashid Khan-i T20 asaya nung wicket 700buba agiogo, aser iba ajanga parnok taruba round-i aitsü atema timla mesamai kümdaktsüogo.

Leg-spinner yagi iba alizüing ya hit wicket ka ajanga tongteta liasü, koba pai wicket 699 agiba mapang khen danga mataloki liasü.

Over 15buba nung Afghanistan captain yagi ball aonba mapang UAE batter Muhammad Arfan-i reverse sweep asütsü merang saka stump nungang zükshia liasü.

Iba wicket ya Rashid asoshi T20 internationals asaya nung wicket 191buba aser List A domestic T20 asayatem nung wicket 509 agiba liasü. Pa ya iba alizüing tongtetba mezügbuba asayar lir.

T20 cricket nung ball 11,794 aonba mapang tang mezüngbuba arishi küm 27 asayar yagi iba yimya nung wicket ka agiogo.

Iba asaya nung Rashid-i over pezü nung run 24 agütsür wicket 1 agia liasü aser Azmatullah Omarzai-i run 15 agütsür wicket 4 agi. Arun

Jaitley Stadium, Delhi nung UAE team-i asayar 9 out ser run 160 yanglua liasü.

UAE nunger asayartem rongnungi Sohaib Khan-i run timba yanglu. Pai ball 48 nung run 68 yanglu aser Alishan Sharafu-ia ball 31 nung run 40 yanglua liasü.

Afghanistan pur batting amenba mapang Rahmanullah Gurbaz duck ka achi, saka külem opener Ibrahim Zadran-i ball 21 nung run 53 yanglua liasü.

UAE nunger bowler Muhammad Arfan-i run 30 agütsür wicket 2 agia Afghanistan pur azüoka liasü saka Omarzai-i Afghanistan atema kanga junga asaya-a team takok dangi ani.

Bowling kanga junga aonba sülen Omarzai-i out mesüi ball 21 nung run 40 yanglua par team-i ball pezü anunga lia asaya akokba nung teyari agüja liasü.

Group D nung Afghanistan team-i tang mezüngbuba point ngutetogo, saka parnoki New Zealand akoktsü nüngdaker shirnok parnok dang nungi point ana agi timba lir.

UAE puria point ana ngua lir aser parnokia tatembangbuba asaya nung South Africa akoktsü

nüngdaker aser taruba round-i aitsü atema New Zealand aser Afghanistan na prongla dang nungi parnok run rate timba asütsüla.

Arsenal pur FA Cup round pongububai iogo

Tsüklai/February 16, 2026 (Agencies): Deobarnü Wigan goal 4-0 agi akokba sülen Arsenal pur küm trok sülen tang mezüngbuba FA Cup round pongububai iogo.

Mikel Arteta-i aniba team yagi third-tier team nem ya asaya tenzüker minute 27 tsüingda goal 4 idakja liasü. Noni Madueke aser Gabriel Martinelli nati mezüngbuba goal ana idaktsü aser iba sülen Jack Hunt-i own goal ka idakja liasü. Goal pezübuba ya Gabriel Jesus-i idaktsü.

2020 küm FA Cup akokba sülen Gunners pur tang mezüngbuba round of 16 tongtetogo. Arteta lenisüba nung parnoki tongtibang asayamungtem rongnung FA Cup ya dang koker lir. Arsenal pur tang Premier League nung temaba jenjang nung lir aser parnok tanabuba jenjang nung aliba Manchester City team den League Cup final asayatsü. Parnok Champions League

Nagaland Sepaktakraw Association-i tenüngsang agütsü



Dimapur, Tsüklai/February 16 (TYO): Nagaland Sepaktakraw Association-i sangdong ka ajanga Mudotsu Dozo nem tenüngsang agütsüogo, shiba India tebur Sepaktakraw team nungi asaya liasü.

Mudotsu Dozo ya India team nungi 6buba South Asian Sepaktakraw Championship nung asaya aser parnoki Team event aser Regu event nung gold medal ngua liasü.

Iba asayamung ya Sri Lanka yimtiba Colombo nung February 6 nungi 11 tashi South Asia linük balala nungi asayartem adenshia kanga takok ngua asayaogo.

Pa tang 20buba Asian games atema India team den renemshiba mapang ka lir.

Nagaland Sepaktakraw Association-i, pai bendanga agüja asayaba, taküm libaliro azüoka litetba aser Indian Sepaktakraw team nem teyari agüja international jenjang nung takok tajung ngutetba atema tenüngsang agütsüogo, aser tarutsü nunga international asayamung balala nung takok ngua asayayonga aotsü imlaja ataba lemsatepogo, ta Nagaland Sepaktakraw Association Secretary Holshe Khrieo-i sangdong ka ajanga metetdaktsü.

nunga round of 16-iogo. Parnok taküm asayamung tongtibang pezüprongla akoktsü maongka lir.

"Asayartem asayatsü asoshi maongka agütsütsü atema temelenshi bener arua liasü. Asayartem kanga junga sendaktepa asayaba aser parnoki nongshia asayaba ngua ni kanga pellar. Asaya mezüngbuba shilem agi tebandang adokdaktsü," ta Arteta-i ashi.

2014 küm Arsenal aser Wigan na semi-final asayaba mapang penalty shoot-out ka asaya aser iba mapang captain Arteta-i goal idakja parnoki asaya koka liasü.

Asaya nung Arsenal defender Riccardo Calafiori warm-up agiba mapang yiru aser iba ajanga Bukayo Saka

anisüngzüka toktsütsü melena asayadaktsütsüsa aküm. Asaya nung Eberechi Eze-a tetenzük nungi asayadaktsü aser Madueke-i idaktsüba mezüngbuba goal ya pai assist sütsüba liasü. Brehostibarnü Brentford den draw nung tembangba asaya nungbo Eze-i junga masayateti liasü. Iba sülen minute 18buba nung Eze-isa Martinelli nem ball tajung ka agüja tanabuba goal idaktsü.

Asaya nungsa minute 23buba nung Wigan nunger asayar Hunt-i own goal ka idaktsü. Iba sülen minute pezü dang lir Christian Norgaard-i agütsüba ball ka Jesus-i kanga junga idakja Arsenal pur goal 4-0 agi tejakdang aküm.

Arsenal pur Premier League nung Bodhbarnü Wolves den asayatsü lir.

BILEMDANGANG

"Langka kar kodanga meimlar, anungji shingaia item atema renema malir."